

Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminut peqquneqarnissaanut Inatsisartut aalajangiiffigisassaattut siunnersuut.

(Inatsisartunut ilaasortaq Kelly Berthelsen, Inuit Ataqatigiit)

Akissuteqaat

(Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoq)

Aappassaaneerera

Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaannik qulakkeerisussamik UKA 2017-imi saqqummiunneqartussamik periusissiamik suliaqaqqullugit Naalakkersuisut peqquneqarnissaat pillugu aalajangiiffigisassatut siunnersuutip aappassaaneernissaanut Inuussutissarsiornermut Aatsitassanullu Ataatsimiititaliap sukumiisumik suliaqarsimaneranut Naalakkersuisut qujassuteqarput.

Sapinngisamik nunatsinni suliffeqarfiit sulisartunit kalaaliusunit inuttalernissaat pillugu anguniagarisat Naalakkersuisut isumaqatigaat.

Suliffeqartitsinermi periusissiaq "Suliffeqarneq toqqissisimanartoq"-mi suliffeqarfinni naalakkersuisoqarfinni suliniutinik tigussaasunik 16-inik inissiisoqareersimaneranik ataatsimiititaliaq isumaliutissiisummini immikkut ittumik pingaartitsinera Naalakkersuisut iluaralugu maluginiarpaat. Ukiuni kingullerni marlussunni suliffissaaleqinerup iluatsittumik annikillissinnerani suliniutit qitiutinneqarnerat takusinnaasimavarput.

Taamatuttaaq sulisussanik avataaneersunik atuisarnermi nassuiaat 2016-imeersoq Nunanit allamiunut suliaqaqarfik ataatsimiititaliap ilaatigut innersuussuteqarnera Naalakkersuisut maluginiarpaat. Misissuineq erseqqissumik takussutissaqarpoq. Nalunaarusiami taaneqarpoq sulisitat Danmarkimi inunngorsimasut ikiliartortut, sulisullu nunatsinnilu inunngorsimasut sivisuunik akunnattumillu sivisussusilinnik ilinniagaqarsimasut amerliartortuurtut.

Taamaattumik najukkami suliffeqarfinni najukkami sulisartut qulakkeernissaanut tunngatillugu ajunngitsumik ingerlasoqartoq Naalakkersuisut isumaqarput. Taamatut ineriartortoqarnissaa naalakkersuinikkut sivisuumik salliutinneqarsimavoq. Sulisorisatsinnik piginnaasanik qaffassaanermik suliaqarneq, aamma inuusuttortagut ilinniagaqalernissamat piareersartinnissaat, aammalu suliffeqarnermi pisariaqartitat tasaapput Naalakkersuisut ingerlatsinerminni pingaarnersiugaanni tunngavigisatut ilaatinneqartut.

Taamatut oqaaseqarlutik Naalakkersuisut ataatsimiititaliap isumaliutissiissutaa tusaatissatut tiguaat.